

Бір ғасыр құпиясы

Артында қалған асыл сөзі жүзін кіреуке шалмайтын ақ алмас болып мәңгі-бақи сананда сақталатын сол бір ғажайып жанды қария пір тұтатын.

Қарттың өзі де қаражаяу емес еді. Топ жарған, әйгілі жырау болмағанмен, дер шағында әркімнен есітіп, зердесіне тоқыған, домбыраға қосылып өзі талай толғаған әр түрлі ақын-жыраулардан қалған өлең-жырдың ұзын-ырғасы әлденеше кештік дүние. Өндірішкі кезінің өзінде-ақ мұны пысық бала атандырып, үлкендердің назарына іліктірген де, айналғанда елсіз-күнсіз жердегі бейітке апарып түнеткен де сол өнерге құштарлығы. Бірақ домбырасын құшақтап, мағынасы түсініксіз дұғаларды үсті-үстіне қайталай, қабырдың топырағын қанша жастанғанымен, бозқұлақтың бойына ақындық дарымады. Сол түннен бастап, бір десте айқайлап, кәдімгідей бусанып қайыратын шумақты құлағы шалысымен қағып алатын елгезектік қана тапты. Әлде қалтқысыз көңілден, аруақтың әйтеуір бір шапағаты тиетініне сенгендіктен бола ма.

«Ең тәтті шырын – өнер шырыны» депті бұрынғылар. Біреулер туа біткен дарынына бас иіп ғұмырын соған арнаса, біреулер қабілет қанатының тапшылығына қарамастан, өнер ордасындағы қойшы-қоландығын басқа қоныстың алтын тағынан ілгері қойып өтеді дүниеден. Ақыл-ой, парасат осылардың тек алдыңғыларына ғана емес, соңғыларына да жанашырлықпен қараса керек-ті.

Бұл кісі де жігіт ағасы атанып, москалдык тап салғанша өлең-жырдан өзгені ойламай желбегей жүрді. Ұлғайған соң ғана арқалы жырды, ұлағатты сөзді хатқа түсірумен шектеліп, домбыраға қосылып бап іздегенді бірте-бірте қойып кетті. Сол қамының ендігі нәтижесі – қолдан көшіргені бар, ерте кезде не кейінірек баспадан шыққаны бар, екі басы тең үлкен қоржын кітап. Көбін иесі жатқа біледі және неше жыл қарамаса да, қайта жаңғыртқанда бір жолды теріс айтып қайталамайтынына таң қаласың.

Қария ақын-жыраулар сөзін әншейін жинап қана қоймай, олардың әрқайсысына өзінше баға беріп отыратын. Манғыстауды қоса есептегенде, Жем – Сағыз, Еділ – Жайық өресінде өткендерден оның назарына ілікпей қалған сөз дүлдүлі кемде-кем. Абыл, Қашаған, Нұрым, Аралбай, Мұрат, Сәттіғұл, Ығылмандарды бүге-шігелеп білетін. Көңілі

келсе, әрқайсысының қай сөзді қай жерде, кімге айтқанына дейін майын тамыза жыр етер еді. Әйтсе де, осы сөз шеберлерінің қайсысын қалай қадірлегенімен, қарияның көкейінің ең төрін, жеке дара, семсерін қайтадан қынына салмай өткен арыстан, өзінің өр рухын табиғаты да, бітісі де ерен жырларымен суарған дара тұлғалы ақын – Махамбет қана иемденетін. «Уа, қызғыш құс, қызғыш құс!...» дегенінде, қарттың көкірегі қарс айрылар еді. Көз шарасын жас шылайтын. «Саф алтынға бергісіз асылсың-ау, Махамбет! Соншама ұлуғы басыңмен «Исатай – басшы, мен – қосшыдан» бір жаңылмастан өткенің сол асылдығың, емес пе!» деп тынатын ол.

* * *

Қарияның жан баласына тіс жарып ашпаған бір құпиясы бар еді: ол өзі пір тұтатын адамның мүрдесі қай төмпешіктің астында жатқанын білетін. Махамбет сүйегін іздеудің нәтиже бермей жүргенін ұзақ жылдар газет-журналдардан қадағалай бағып отырған ол ұлы ақынның қойылған жері бұдан өзге тірі пендеге белгісіз екенін ақыры біржола түсінді...

Әкесі марқұмның мұны жапан түздегі ескі қорымға ілестіріп апарып, Махамбет қабірін көрсететіні қалың ел ата мекенін тастап, Жайық бойына үдере көшіп жатқан мың тоғыз жүз отызыншы жылдың күзі екен-ау.

– Құлағыңды сал, шырағым, – деген болатын үлкен кісі, – бұл жердің о бастағы аты Қабанбай – Қарақалпақ, кейінгі кезде Қарой атанып та жүр. «Қабанбай – Қарақалпақ, өскен жерім, Кір жуып, кіндігімді кескен жерім...» деп ақын атаң Мұраттың жырға қосқаны осы ара; үстінен талай көштік, талай түстеніп, өткен-кеткенді әңгіме еттік. Бабаларымыздың қонысы екен, мен ес білгелі елсіз, жарықтық... Махамбет сүйегінің осы арада, осы қорымда екенін өзіміздің елдің мен шамалас біраз қарты білуге тиіс. Бірақ сөйте жүре, еш адам көп қабірдің қайсысы Махамбет қабірі екенін білген емес. Жарықтықты пір тұтқан кіреукелі пенде үшін атын атаса болғаны да. Олар түгілі, моласын көрсетем деп белсеніп шалдарыңның ішінен де ешкім шыға алмас еді. Көзі тіріден оны білетін – мен ғана...

Жігіт әкесіне оқыс қарап еді. Сол бойда үлкеннің қасына бала орнына ілесіп келе жатқанмен, әлдеқашан үйлі-баранды болып, ақыл тоқтатқан шағы болатын. Сыртына шығарып айта алмаса да, әке сөзінің ақиқаттығына шүбәланған.

Көпті көрген көне емес пе, қария баласының көңіліндегі түйткілді сезді.

– Осы қорымда жатқан ұлы бабаң Бектұрған әкемнің әкесі, Махамбетпен тұрғылас адам екен, – деді ол енді ұлына зер салмай, құла

түзді шолып.— Батыр Жайықтың осы бетін паналағанда, қару асынып белкүлі соңына ілеспегенмен, қолынан келген көмегін аямай алдына тосып, онымен көңілде болыпты. Бұл қорымның табан тартуына себеп Махамбеттің осы арада мерт болуы ғой, бабаң марқұмға да кейін осы араның топырағы бұйырулы. Батыр сүйегінің қай төмпешіктің астында екені сол кезден бері үзілмей келе жатқан құпия, шырағым...

Қария тыныстап, ауыр күрсінді.

— Батырдың басына о кезде де, кейін де белгі қойылмаған. Ал енді ой жүгіртіп қарасаң, жүз жылға тарта мерзім дегенің төрт-бес атаның ғұмыры емес пе. Ол уақыттың ішінде атаусыз мола түгілі, басында құлнытасы болмаса, атаулы, үстінде үйі бар моланың өзінен не қалар. Мұны түсінетін жасқа жеттің ғой, ойлан, пікір ет: не үшін түү жер түбінен арып-ашып келе жатқанымызды ұқ...

— Айта беріңіз, әке, — деді баласы.

— Ел аяғы болса, қозғалайын деді, — әкемнің өсиетін орындап, осы бір қасиетті құпияны саған аманат еткелі келдім. «Қисая кетсем, мойныма борыш болады-ау әрі жарықтықтың қабірі із-түзсіз жоғалып кетеді-ау!» деп, түн ұйқым төрт бөлінеді. Кейінгі кездері ауырып-сырқай беретінімді өзін көріп жүрсін...

Аталы-балалы екеуі қамшыларын бүктеп ұстаған қалыпта біріне бірі қарсы қарап тұр еді. Жігіт үнсіз бас изейді.

— Саған өсиетім: құдай тілегенге жеткізіп, ана нашар балалардан кейін ер бала көрінсе, қуатыңның шын ортайғанын сезген шағында, ақыл-есіңнің дұрысында, қай жерде жүрме, не күйде болма, ертіп әкеп, мына мен сияқты осы аманатты көзбе-көз тапсырасың! Дос бар, дұшпан бар — марқұмның сүйегін қорлап ашам деушілер табылар, сондықтан шартты мезгіл жеткенше бұл сырды тісіңнен шығармайсың! «Осы өсиетіңді орындаймын!» деп құдай алдында уағдаңды бере алармысың, балам?

— Өсиетіңді бұлжытпай орындаймын, әке! — деді баласы, қарттың жүзіне тура қарап. Екі иығына екі кісі мінгендей ірі денесі ширыға, онсыз да биік бойын тіп-тік ұстап, тебірене айтты. — Шыбын жанымды қиярмын, бірақ бұл сырды көлденең тірі пендеге ашпаспын, — жүріңіз көрсетіңіз! — деді.

Бұл сөзге әкесінің риза болғандағысы шығар — көз құйыршығына әжім түйдектеліп, мұрты жыбыр етті. Аузына жұдырығын тоса, жөткірініп қойғанына дейін баласының әлі көз алдында.

* * *

Тірліктің неше түрлі соқпағына ұшырап, ащы-тұщыны мейілінше тартқан бұл адам, асылында, қайшылығы бір басына жеткілікті күрделі пенде еді.

Қарияның көптен көрмеген бір жолдасы бұл кісі беріде пенсияға шыққаннан кейін үйіне сәлемдесе келгенінде:

— Соның өзі қалай болды? — деді замандасына. — Танымайтын, білмейтіндер сені көрсоқыр надан демей ме? Оқыған-тоқығаның, көрген-білгенің біздің қайсымыздан да ілгері: орысша да, қазақша да сауатың мол. Сөйте тұра байтақ елге қажет сырды сонша уақыт бүккенің... Қой бастаған серкедей сен сөйткенде бізге, өзге қараң-құран шалдарға, не жорық.

Үй иесі тұрғыласына ұзақ тостырып жауап беріп еді.

— Ешқашан еш нәрсеге күмәні жоқ, қиналыс-қапысы жоқ, нені болса да айдан анық түсіне кеткіш, анау алай емес бұлай десен, сене кеткіштер — есінде болсын, күндіз күлкісі, түнде ұйқысы тұтас нағыз бақытты жандар солар, — деген. — Мен ондай емеспін, құдай бермеген мінезге не амал қылайын. Сол себепті де, ойлап отырсам, Махамбет қабірі мен басшылардың кеңсесі арасына, былайша айтқанда, қарға адым жерге, отыз жылға тарта жүріппін, — жақсысың де, жамансың де ерік өзінде. Жалғыз ғана медетім сол — осы жасқа келгенше ойланып-толғанып, белді бекем буып істеген ісіме өкінген кезім болмап еді, бұл жолы да өкінбеймін...

Екеуі біраз уақыт өзді-өзі отырып қалған.

— Намаз оқып, ораза ұстап жүрген шығарсың қолың босағалы? — деп қонақ кенет тың сарынға көпті.

Үй иесі әуелі замандасына барлай қарады да, сосын мырс етіп күлді.

— Әй, бар болғыр, — даусында өкпе-наз бар еді, — Махамбетке байланысты құпияны тісіңнен шығармағаның діншілдігіңнен демексің-ау? Әйтпесе неменеге керексіте қалдың менің намаз оқып-оқымайтынымды?

— Сонда да, сонда да, шалым? — Қарияның қонағы көңілді шырай танытып сылқ-сылқ күлді.

— Жоқ, оқымаймын, — деді үй иесі.

— Неге, алдында сұрау-сауал бар емес пе, дайындалмаймысың, есеп-кисап жасап қоймаймысың?

— Сұрау-сауал бар екен деп мен оған онша күйгелектенбеймін. Күйгелектенбейтін себебім өзім өз боп ат жалын тартып мінгелі елу жылға тарта ел қатарлы қызмет істеген екем; сол елу жылдың ішінде менің зәбірімнен бір сәби зарығып жыламапты, бір жоқ-жітік обалды жан: «Көресіні сенен көрдім-ау!» — деп қарғамапты. Біреуді жарылқап едім демейін, бірақ ауылдың арғы шетіндегі шанырақ тауқыметін аркалап қалған бозөкпенің шаруасындағы олқылықты өз қабымның ортайғанынан кем санағам жоқ. Айналана, осы күнделікті тірліктің өзіне

ой жүгіртші. Мына қыбырлап жүрген құмырсадай көп адамның қайсысын алма, оның істеген ісі, атқарған игі қызметі, жұртқа жасаған жақсылығы қадірлі ме, жоқ әлде бүкіл құмырын бейберекет былғанышпен, қиянатпен өткізіп, соңынан, әбден қайраны кеткен шағында: «Құдай, сен де, халайық, сендер де менің сұрқиялымды жоқтамаңдар. Мен өкінген болайын, ал сендер кешіріңдер!»— деген сандырағы қадірлі ме, айтшы өзін?!

Қонақ сұраққа тура жауап бермеді.

— Ал сен сөйтесің енді, сөйтесің, айтып жүрмін ғой... — деп дерексіздеу күлді де, жастыққа жантая кетті.

Үй иесі болса ұстамды, ойлы қалпын өзгерткен жоқ. Қонағын қоңырқай шолды да, әңгімесін жалғай берді:

— Сондықтан менің Махамбетке қатысы бар сырды бүккенімнің себебін тек қана діншілдігімнен іздемеңдер. Оның сыры әріде, тіпті, өзім де түсіндіріп айта алмас ем. Көрің бар, жасың бар, менің сендерден өтінетінім — бір нәрсеге күмән келтіре көрмен: Махамбеттің қасиетті қабірінің із-түзсіз жоғалып кетуге тиіс емес екені менің ойымнан ешқашан шыққан емес. Осыған күмән келтірмесеңдер болды.

* * *

Ол Отан соғысынан елге, денесінде жарақаттан сау тамтық жоқ, әбден қартайып оралды. Бірақ көзін ашқалы бері тырбынып еңбекпен келе жатқан кешегі жауынгер жан тыныштығын ойламады, келісімен қызметке кірді. Ұзамай ол аз күнге мұрсат алып, қияндағы, сонау Атырау облысындағы, атамекеніне кетті. Өлі біткенге түгел зират етіп, Қабанбай — Қарақалпақтағы төмпешіктерді тағы көріп қайтты. Аранын ашқан ажалмен үш жылдан астам арпалысып, өлім мен өмірдің арасы кейде қас қағым екенін мың мәрте көргендігінен бе әлде жасының ұлғайғандығынан ба, енді ол Махамбет аты аталған жерде кенет томсарып, ешкіммен сөйлеспей, сарылып ұзақ ойланатынды шығарды.

Қарияның үй іші ұлы ақынның атына байланысты мынадай әңгімені ерекше бөліп айтады.

Бір кездері, елуінші жылдардың орта тұсында, қарияның біріне бірі тете екі ер баласы қатарынан Алматыда оқыды. Солардың үлкені жазғы демалысын алып, үйге келген кездерінің бірінде қарт кештетіп ауладағы биік сәкінің үстінде тынығып жатқан. Көзі баласының қолындағы кітапқа, ішіндегі суретке түсті.

— Кітабыңдағы сүгірет бұ... кімнің сүгіреті, шырағым? — деп сұрады біраздан бері жанары кіреукеленіп, жақыннан гөрі алыстан жіті

аңғаратын болып алған қария. Келесі сәтте ол басын жастықтан оқыс жұлып алып, екі көзі жасаурап, баласына қадала қалып еді. «Ақсақ Темірдікі» деп жауап берген болатын ұлы.

— Шын сүгірет пе әлде өтірік сүгірет пе?— деп шұқшия түсті қарт.

— Кәдімгідей...

— «Кәдімгі-мәдімгі» деген не, дұрысын айтпайсың ба бұ! — Үлкен кісі ренжіп қалды. — Мал бағуды, от жағуды үйретпей-ақ қойсын, адаммен адамша сөйлесуді де үйретпей ме бұ сендерге?

— Шын сурет дегенім ғой, әке...

— Қайтіп шын сүгірет бола алады? Кім оны салып жүрген?!

— Герасимов деген кісі.

— Кім ол? Әлгі...

— Жок, суретші емес, тарихшы әрі антрополог, әке.

— Кім?!

— Антрополог... яғни адамзаттың өсіп-дамуын, әр түрлі тектерге бөліну себептері мен ерекшеліктерін тексеретін ғалым. Мынау бірден қағазға салынған сурет емес, балшықтан жасалған мүсіннің тасқа басылған бейнесі. Ол кісі мүсінді Темірдің қазып алынған бас сүйегін пайдаланып, өзі ашқан заңдылыққа сәйкес ет орнына балшық жапсырып жасаған...

Баласы сол жолы әкесіне орыстың белгілі зерттеушісінің әдісі, тындырған істері жайлы әңгімелеп беріп еді. Қараңғы түсті; қария ұлын жанынан жібермей, аспандағы мыңсан жұлдызға телміре қарап жатып тыңдады. Баласы әңгімесін тәмамдаған соң барып:

— Тағы не айтасың? — деп сұраған.

— Осы... бітті, — деді әке қабағын бағып өскен баласы.

— Бәрі өтірік! — деді қария біраз үнсіздіктен кейін.

Бірақ үлкен кісі байқамапты: шикі кезінде бұйығы, не айтсаң соған көне кететін ұлының мінезі туған ұясынан алыста өткізген аз ғана жылда мықтап өзгерген екен: ширығып, әкесіне қарсы дау айтып, Герасимовтың қолымен орыстың ертеде өткен көптеген белгілі адамдарының мүсіндері жасалғанын, орыс жұртының ол бейнелердің дәлдігіне еш шүбә келтірмейтінін дәлел етіп алға тартты. Бірте-бірте даусы нық, айбынды естіле бастады. Әкесі риза болғандағы әдетімен ептеп жөткірінді. Түсін оқыс жылыта: «Қарашы айнымай тартуың шіріктің!» — дегісі келіп жатқан сияқты.

Қария қыруар дәлелдің ешқайсысына да тұшынбап еді. Зер сала мұқият тыңдап алған соң «бәрі өтірікі» деуден жазбаған. Тек қана әбден қаратер болған баласы жаңағы әдістің криминалистика, яғни тергеу саласында кенінен қолданылатынын, әлдеқалай табылған бас сүйектен

адамның бет әлпетін жасап шығарғанда, мерт болған кісінің туыстары айтпай танитынын әңгімелегеннен кейін қария үн-түнсіз қалды. Әлден уақытта қабырғаға қарай аунап түсті. Сосын қолының басын ғана қозғап: «Бар, бар, киноға бар», – деді ұлына, шаршаған үнмен.

Ұлы түн ортасы ауа ойын-сауықтан оралса, әкесі әлдеқашан піскен етті де «бала келсінді» сылтауратып жемей, сол теріс қараған қалпында жатыр екен.

...Ел игілігі жолында қарапайым да болса ұзақ жылдар атқарған мінсіз қызметіне байланысты, еңбек жолын аяқтай келе қария үлкен құрметке бөленді. Облыс, аудан басшылары, қала берді ауылдағы көз көрген азаматтар ыстық ықыластарын білдіріп, алғыстарын айтты, қарттың иығына шапан жапты. Елу жетінші жылы ол тұмырында алғаш рет курортқа барып, Қырымда демалды. Кері жолында Мәскеу мен Ленинградты аралап тамашалады. Сол сапарынан ол түлеп, ажарланып қайтты.

Сыйлы ауыл ағасының алыс жолдан сау-саламат оралуына байланысты, әрі жылы лебіз білдіргелі, әрі әңгіме тыңдамақ ниетпен оның үйіне көп адам жиналды. Табиғатында жомарт жан бұған қуанып, қалай демалғанын, не істеп, не қойғанын әдетінен тыс қызына баяндады. Шәй үстінде басталған бұл әңгіме асқа жалғасып үзілген болатын. Сонда барып қария «тағы нендей қызық көрдің?» деген тұрғыластарына қапелімде жауап бере қоймай томсарды да:

– Қызық емес, орыс жұртының озық өнегесін көрдім, – деді. – Орыстың бұрын өткен өнер адамдарына деген құрметі – құрмет емес-ау, тіпті, артық-кемі жоқ мүнәжат етушілігі – ғажап екен! Қырымда Чеховтың, Сергеев-Ценский деген жазушының музей боп тұрған үйлерін аралап ем, Мәскеу мен Ленинградта өздерің білетін Пушкиннің атын ауамен қоса жұтып, таң-тамаша қалдым. Арманы жоқ екен орыстың халқына арнап тер төккен өнерпаз азаматтарының!..

Осы мәжілістің ертеңіне қария кемпірін таң қылаң бере оятып, шәй кайнаттырып ішті де, аудан орталығына аттанды. «Бірінші хатшыда шаруам бар» деп шолақ қайырды жүгерінде.

* * *

Мың тоғыз жүз елу сегізінші жылдың жаз күндерінің бірінде Қабанбай – Қарақалпақтағы ескі қорымның күн батыс бетін ала ширек шақырымдай жуық барып, үш жеңіл мәшина тоқтады. Алғашқыларынан түсе-түсе қалған бес адам қауымға қарай аяңдады. Алдыңғы жұбы қазақтың белгілі әдебиетші-ғалымы мен атышулы ақыны еді де, соңғы жұбы екі облыстың көршілес аудандары партия

комитеттерінің бірінші хатшылары болатын. Таза да келісті киінген, кең маңдайлы, ат жакты, еңгезердей ірі денелі аксұр қария олардан кейінірек, қорымға қарай дара қадам басты. Сәл кідірістеп, баршаға арнай бет сипаған ол енді серіктерінен оза берді. Ілгері аттаған аяғы кері кетіп, қарт ыр-ыр етіп шабан жылжиды. «Жатырмысың, арыстаным? Сөзінді күнде сағынған, аруағына табынған ұрпағың келді ғой бүгін басыңа!» деп тебіреніп келеді. Көз тиянақтарға тек табы ғана бар, кеспелтек екі таяқ шаншылған ескі қабірдің жанына барды да, шөп-шөңгені жапыра, тізерлеп отыра кетті. Келесі сәтте ол бір дұғаны бастап кетіп еді. Қарияның төрт серігі сәл шеттенкіреп, кейін тұр. Өздерін жинақы ұстайды. Ғалым мен ақын терең астарлы көз қараспен шырайласып қояды. Әлден уақытта барып бетін сипаған қария орнынан тұра қоймады, тамағын кенеп біраз отырды да, жыр оқи жөнелді:

«Еңселігім екі елі,
Егіз коян шекелі,
Жараған теке мүшелі,
Жауырыны жазық, мойны ұзын,
Оқ тартарға қолы ұзын, –
Дұшпанына келгенде
Тартынбай сөйлер асылмын.
Құла бір сұлу ат мінген,
Құйрық-жалын шарт түйген,
Құмсағыздай созылған,
Дулығалы бас кескен,
Ту түбінен ту алған,
Жауды көрсе қуанған –
Мен Өтемістің баласы
Махамбет атты батырмын», –

деп мүдіріп еді ол.

– Е, бәсе, Махамбетпен осылай жүздессек жөн еді! – деді ғалым мен ақын қосарлана.

